

Director artistico Alida Martinez:

Segundo bienal di Aruba na caminda

ORANJESTAD - E segundo bienal di Aruba ta na caminda. E biaha aki lo duna oportunidad na artistanan Arubiano hoben cu ta studiando afo como tambe e grupo di hoben aki na Aruba un oportunidad pa expresa nan mes por medio di nan arte. Pero tambe lo tin algun artista invita cu ya a forma parti di e prome bienal.

Esaki directora, artista y organizado di e prome bienal Alida Martinez a divulga den un entrevista cu Bon Dia Aruba.

Segun sra. Martinez, lo entrega un proposicion di e proyecto na e Cumbre Cultural cu gobierno ta organisando actual. Rosea Nobo ta nomber di e proyecto cual ta un exposicion cu ta tuma luga entre artistanan pa eyan selecciona ken lo bay competi na e bienal. Esaki lo bira e di dos Rosea Nobo tambe pa wordo organisa na Aruba.

Buki pa enseñansa

Algun copia di e buki ta actualmente na benta cerca sra. Martinez, pero e motibo principal cu a bin cu e buki aki ta pa expone obranan di artis-

tanen local, e ta bisa. Pero sra. Martinez su deseo ta pa por logra incorpora e bukinan aki den enseñansa, den e lesnan di expresion of arte. Pa asina e alumnonan por desaroya mas ariba e area aki. E ta sigui splica cu ta man'e "un simia" a wordo planta den e campo di arte contemporaneo na Aruba. "Un idea completamente pensa, eherce y logra door di mi cual ta subi Aruba riba plataforma internacional den e area di arte contemporaneo."

Sra. Martinez a agrega bisando cu e ana aki lo tin un encuentro unda lo planifica ki fecha por bin cu e di dos Rosea Nobo, sigi pa e bienal aki na Aruba cu despues lo continua cu un segundo buki di Rosea Nobo.

E prome buki

Den e prome buki titula 'E Rosea Nobo', caminda pa e prome bienal por a wak obranan di 29 artista aden. E buki cu ya a wordo traha algun luna pasa, ta di e artistanan cu a participa na e bienal cu a tuma luga na 2011-2012 den e transcurso di 3 luna. Awor ta riba mercado y

manera Martinez a menciona caba, e ta spera cu scolnan lo bay uza nan.

Ministerio di Economia a brasa e proyecto aki como cu e ta un proyecto nobo, innovativo y educativo,

sr. Martinez ta splica, locual e ta aprecia masha hopi mes. Pa e di dos bienal, e ta finalisa, ainda no por duna mucho detayes. Tur cos ta depende di e resultado cu ricibi dia di e Cumbre Cultural. □

